

**JU UNIVERZITET U TUZLI**

**PRAVILNIK**  
**o radu Fonda za stipendiranje i nagrađivanje studenata dodiplomskog studija i**  
**naučno usavršavanje zaposlenika JU Univerzitet u Tuzli**

**Tuzla, oktobar 2001. godine**

Na osnovu člana 215. stav 1. Pravila Javne ustanove Univerzitet u Tuzli, Upravni odbor Javne ustanove Univerziteta u Tuzli, na sjednici održanoj 10.10.2001. godine donio je

**PRAVILNIK  
O RADU FONDA ZA STIPENDIRANJE I NAGRAĐIVANJE STUDENATA  
DODIPLOMSKOG STUDIJA I NAUČNO USAVRŠAVANJE ZAPOSLENIKA JU  
UNIVERZITET U TUZLI**

**I OPĆE ODREDBE**

**Član 1.**

Radi podsticanja i razvijanja interesa studenata za postizanje boljeg uspjeha u toku dodiplomskog studija kao i podsticanja zaposlenika za naučno usavršavanje u cilju sticanja naučnog, odnosno umjetničkog stepena magistra, odnosno doktora nauka, iz sredstava Fonda za stipendiranje i nagrađivanje studenata dodiplomskog studija i naučno usavršavanje zaposlenika JU Univerzitet u Tuzli (u daljem tekstu: Fond) mogu se dodjeljivati posebna priznanja, stipendije, novčane nagrade, te finansirati troškovi za sticanje naučnog stepena magistra, odnosno doktora nauka zaposlenika JU Univerziteta u Tuzli (u daljem tekstu: Univerzitet).

**Član 2.**

Za postignuti uspjeh u toku dodiplomskog studija (u daljem tekstu: studij) studentima, odnosno zaposlenicima se mogu dodijeliti:

- posebna priznanja u obliku zlatne i srebrene plakete,
- stipendije studentima svih godina dodiplomskog studija izuzev I godine,
- stipendije studentima I godine – učesnicima na Olimpijadi znanja,
- novčane nagrade dobitnicima Zlatne plakete,
- školarine za postdiplomski studij na univerzitetu u zemlji i inostranstvu,
- sredstva za sticanje naučnog stepena doktora nauka.

**Član 3.**

Finansiranje Fonda vrši se iz: sredstava koja Univerzitet ostvari ustupanjem korištenja znaka Univerziteta; namjenskog dijela troškova postdiplomskog studija i namjenskog dijela troškova za sticanje naučnog stepena doktora nauka u visini utvrđenoj Odlukom Upravnog odbora Univerziteta; donacija, poklona i zavještanja; kamata na deponovana ili oročena sredstva i dr.

Finansijskim planom Fonda koji, za svaku budžetsku godinu, donosi Upravni odbor Fonda utvrđuje se:

- ukupan iznos sredstava kojima Fond raspolaže u tekućoj budžetskoj godini po izvorima tih sredstava,
- raspored ukupnih sredstava po namjenama koje se, u skladu sa raspoloživim sredstvima, mogu finansirati u tekućoj budžetskoj godini, i
- iznos sredstava za svaku namjenu.

Finansijski plan Fonda iz stava 1. ovog člana Upravni odbor Fonda donosi najkasnije do 15. novembra tekuće godine.

#### **Član 4.**

Odluku o dodjeljivanju: priznanja, stipendija, novčanih nagrada i školarina donosi Upravni odbor Fonda na način i po postupku utvrđenom ovim Pravilnikom.

#### **Član 5.**

U svom radu Fond se koristi pečatom Univerziteta.

## **II DODIPLOMSKI STUDIJ**

### **1. Posebna priznanja za uspjeh u studiju**

#### **Član 6.**

Za postignuti uspjeh u studiju studentima upisanim na dodiplomski studij na Univerzitetu mogu se dodjeljivati posebna priznanja u obliku zlatne i srebrene plakete Univerziteta.

#### **Član 7.**

Zlatna plaketa Univerziteta dodjeljuje se studentu koji je u redovnom roku završio studij sa prosječnom ocjenom 9,00 i više u toku studija i diplomirao najkasnije do 15. novembra tekuće godine u kojoj je ovjerio zadnji semestar.

#### **Član 8.**

Srebrna plaketa Univerziteta dodjeljuje se studentu koji je do kraja školske godine položio ispite iz svih nastavnih predmeta obuhvaćenih nastavnim planom za tu godinu studija, sa prosječnom ocjenom 9,00 i više, pod uslovom da je studijsku godinu slušao prvi puta.

#### **Član 9.**

Bronzana plaketa Univerziteta dodjeljuje se studentu koji je do kraja školske godine položio ispite iz svih nastavnih predmeta obuhvaćenih nastavnim planom za tu godinu studija, sa prosječnom ocjenom višom od 8,50, a manjom od 9,00, pod uslovom da je studijsku godinu slušao prvi puta.

#### **Član 10.**

Akademija i fakulteti Univerziteta (u daljem tekstu: fakulteti) sastavljaju privremenu listu kandidata za posebna priznanja do 01. novembra i dostavljaju je Upravnom odboru Fonda.

#### **Član 11.**

Posebna priznanja dodjeljuju se povodom Dana Univerziteta, 18. novembra i nose naziv "Posebna priznanja Univerziteta za postignuti uspjeh u studiju".

#### **Član 12.**

Odluke Upravnog odbora Fonda o dodjeli posebnih priznanja objavljuju se u Biltenu Univerziteta.

## **2. Stipendije**

### **Član 13.**

Iz sredstava Fonda dodjeljuju se stipendije kao poseban vid stimulacije studenata i materijalna potpora u toku studija.

### **Član 14.**

Pravo učešća na konkursu za dodjelu stipendija imaju studenti svih fakulteta, svih studijskih godina, osim prve, pod uslovom.

- da su prethodnu godinu studija slušali prvi puta,
- da su do kraja školske godine položili sve ispite iz prethodne godine studija i ostvarili prosječnu ocjenu od najmanje 9,00.

Stipendije se mogu dodjeljivati studentima koji ispune uslove utvrđene ovim Pravilnikom bez obzira da li koriste stipendiju ili kredit po nekom drugom osnovu.

### **Član 15.**

Upravni odbor Fonda, u skladu sa Finansijskim planom Fonda, raspisuje konkurs za dodjelu stipendija.

Konkurs iz stava 1. ovog člana Upravni odbor Fonda raspisuje najkasnije do 01. novembra tekuće godine.

Odlukom o raspisivanju konkursa utvrđuje se naročito: broj stipendija koje se dodjeljuju za tekuću školsku godinu, visina stipendije, uslovi pod kojima se može dodijeliti stipendija, način i rok za podnošenje prijava na konkurs.

Konkurs za dodjelu stipendija objavljuje se na oglasnim pločama fakulteta.

### **Član 16.**

Prijave na konkurs za dodjelu stipendija kandidati dostavljaju Upravnom odboru Fonda.

### **Član 17.**

U postupak prispjelih prijava na konkurs, a prije donošenja odluke o dodjeli stipendija, Upravni odbor Fonda od fakulteta pribavlja potrebnu dokumentaciju od značaja za utvrđivanje činjenica.

### **Član 18.**

Stipendije se dodjeljuju za jednu školsku godinu.

### **Član 19.**

Upravni odbor Fonda dužan je donijeti Odluku o dodjeli stipendije u roku od 15 dana od dana isteka roka za podnošenje prijava na konkurs.

Na Odluku Upravnog odbora Fonda o dodjeli stipendije, zainteresovani kandidat, može uložiti prigovor Upravnom odboru Univerziteta u roku od 15 dana od dana njenog isticanja na oglasnim pločama fakulteta i WEB stranici Univerziteta .

Odluke Upravnog odbora Univerziteta, donesene u postupku po prigovoru, su konačne.

#### **Član 20.**

O rezultatima konkursa Upravni odbor Fonda obavijestit će, posebnim aktom, sve kandidate koji su učestvovali na konkursu.

#### **Član 21.**

Student gubi pravo na stipendiju:

- ako prekine studij, odnosno ne ovjeri zimski i ne upiše ljetni semestar tekuće školske godine,
- ako mu u toku školske godine bude izrečena disciplinska mjera, određen pritvor ili bude upućen na izdržavanje kazne zatvora zbog učinjenog krivičnog djela,
- ako izjavi da ne želi više da prima stipendiju.

Upravni odbor Fonda pribavlja obavještenja putem fakulteta iz prethodnog stava nakon ovjere zimskog, odnosno ljetnog semestra.

#### **Član 22.**

Prava i obaveze stipendiste utvrđuju se ugovorom koji student zaključuje sa Univerzitetom.

#### **Član 23.**

Izuzetno od odredaba člana 14. ovog Pravilnika, Upravni odbor Fonda, na prijedlog rektora može dodijeliti stipendiju i studentu I godine, učesniku svjetske olimpijade znanja.

#### **Član 24.**

Posebno nadarenim studentima drugih Univerziteta, a koji predstavljaju deficitaran saradnički kadar na Univerzitetu u Tuzli, takođe se mogu dodijeliti stipendije pod uslovima utvrđenim ovim Pravilnikom za dodjelu stipendija studentima Univerziteta.

### **3. Novčane nagrade**

#### **Član 25.**

Novčane nagrade dodjeljuju se studentima Univerziteta koji su ispunili uvjete iz člana 7. ovog Pravilnika i dobitnici su Zlatne plakete kao posebnog priznanja Univerziteta za uspjeh u studiju.

Novčane nagrade uručuju se povodom Dana JU Univerzitet u Tuzli.

#### **Član 26.**

Odluku o dodjeli novčane nagrade donosi Upravni odbor Fonda.

Prijedlog za dodjelu novčane nagrade, fakultet je dužan dostaviti Upravnom odboru Fonda najkasnije 3 dana prije Dana Univerziteta.

Visina novčane nagrade utvrđuje se za svaku školsku godinu u skladu sa raspoloživim sredstvima Fonda.

### **III POSTDIPLOMSKI STUDIJ**

#### **1. Školarine**

##### **Član 27.**

Iz sredstava Fonda, studentima postdiplomskog studija koji su zaposlenici Univerziteta sa punim radnim vremenom, dodjeljivat će se školarine za pokriće troškova postdiplomskog studija kojeg organizuje Univerzitet za sticanje naučnog, odnosno umjetničkog stepena magistra iz naučnih oblasti za koje je matičan, a u visini priliva namjenskih sredstava utvrđenih Odlukom Upravnog odbora Univerziteta.

##### **Član 28.**

Studentima postdiplomskog studija iz prethodnog člana dodjeljivat će se školarine u punom iznosu, putem internog konkursa koji se raspisuje istovremeno sa konkursom za upis kandidata na postdiplomski – magistarski studij.

##### **Član 29.**

Upravni odbor Fonda u skladu sa Finansijskim lanom raspisuje konkurs za dodjelu školarina najmanje dva puta godišnje, u skladu sa raspoloživim sredstvima.

Konkurs iz stava 1. ovog člana Upravni odbor Fonda raspisuje u mjesecu novemru i maju u pravilu svake godine.

U Odluci o raspisivanju konkursa utvrđuje se: broj školarina koje se dodjeljuju za tekuću godinu, oblast i smjer postdiplomskog studija na Univerzitetu, odnosno na drugom univerzitetu, visina školarine, uslovi pod kojima se može dodjeljivati školarina, način i rok za podnošenje prijave na konkurs.

##### **Član 30.**

Prijave na konkurs za dodjelu školarina kandidati dostavljaju Upravnom odboru fonda.

##### **Član 31.**

Upravni odbor Fonda dužan je donijeti Odluku o dodjeli školarine u roku od 15 dana od dana isteka roka za podnošenje prijave na konkurs.

##### **Član 32.**

Na Odluku Upravnog odbora o dodjeli školarina, zainteresovani kandidat može uložiti prigovor Upravnom odboru Univerziteta u roku od 15 dana od dana isticanja na oglasnim pločama Fakulteta i WEB stranici Univerziteta.

Odluke Upravnog odbora Univerziteta donesene u postupku po prigovoru su konačne.

##### **Član 33.**

O rezultatima konkursa Upravni odbor Fonda obavještava učesnike konkursa posebnim aktom.

##### **Član 34.**

Prava i obaveze studenata, korisnika školarina, utvrđuju se ugovorom koji se zaključuje sa Univerzitetom.

#### **IV FINANSIRANJE IZRADE I ODBRANE DOKTORSKE DISERTACIJE/DOKTORSKOG STUDIJA**

##### **Član 35.**

Zaposlenicima Univerziteta sa punim ili dijelom radnog vremena dodjeljivat će se sredstva na ime pokrića troškova izrade i odbrane doktorske disertacije za sticanje naučnog stepena doktora nauka iz naučnih oblasti za koje je Univerzitet matičan, a visini i po prioritetima koji se utvrđuju odlukom Upravnog odbora Fonda.

##### **Član 36.**

Zaposlenicima iz prethodnog člana dodjeljivat će se sredstva u punom iznosu putem internog konkursa, a u skladu sa finansijskim planom Fonda.

##### **Član 37.**

Upravni odbor Fonda donosi odluku o raspisivanju konkursa za dodjelu sredstava za namjene utvrđene članom 35. ovog Pravilnika.

U Odluci o raspisivanju konkursa utvrđuje se: broj školarina koje se dodjeljuju za tekuću godinu za određenu naučnu oblast, visina i uslovi pod kojima se može dodjeljivati, način i rok za podnošenje prijave za konkurs.

Konkurs se raspisuje najmanje dva puta godišnje u mjesecu novembru i maju, a objavljuje se na oglasnoj ploči Univerziteta.

##### **Član 38.**

Prijave na konkurs za dodjelu školarina, kandidati dostavljaju Upravnom odboru Fonda.

##### **Član 39.**

Upravni odbor Fonda dužan je donijeti Odluku o dodjeli školarina u roku od 15 dana od dana isteka roka za podnošenje prijave na konkurs.

##### **Član 40.**

Na Odluku Upravnog odbora o dodjeli školarina, zainteresovani kandidat zbog bitnih povreda odredaba Pravilnika, može uložiti prigovor Upravnom odboru Univerzieteta u roku od 15 dana od dana njenog isticanja na oglasnim pločama Fakulteta i WEB stranici Univerziteta.

Odluke Upravnog odbora Univerziteta donesene u postupku po prigovoru su konačne.

##### **Član 41.**

O rezultatima konkursa Upravni odbor Fonda obavještava posebnim aktom sve učesnike konkursa.

##### **Član 42.**

Prava i obaveze korisnika školarina utvrđuju se ugovorom koji se zaključuje sa Univerzitetom.

#### **Član 43.**

Izuzetno, Upravni odbor Fonda može zaposleniku odobriti školarinu za postdiplomski-magistarski studij, odnosno sticanje naučnog stepena doktora nauka i na drugom univerzitetu u zemlji i inostranstvu ali najviše u visini cijene za iste namjene na Univerzitetu.

### **V UPRAVLJANJE FONDOM**

#### **Član 44.**

Fondom upravlja Upravni odbor koji ima 11 članova.  
Upravni odbor Fonda imenuje Upravni odbor Univerziteta iz reda predstavnika fakulteta istaknutih naučnih, odnosno umjetničkih radnika i studenata.

#### **Član 45.**

Upravni odbor Fonda ima predsjednika. Rektor Univerziteta je po položaju predsjednik Upravnog odbora Fonda.  
Upravni odbor Fonda ima i zamjenika predsjednika kojeg bira iz reda svojih članova.

#### **Član 46.**

Mandat članova Upravnog odbora Fonda traje dvije godine.

#### **Član 47.**

Upravni odbor Fonda radi na sjednicama.  
Sjednice Upravnog odbora Fonda saziva i njihovim radom rukovodi predsjednik Upravnog odbora Fonda, a u njegovoj odsutnosti zamjenik predsjednika.  
Ukoliko sjednici Upravnog odbora Fonda ne prisustvuje ni zamjenik predsjednika, njenim radom rukovodi lice izabrano na toj sjednici.

#### **Član 48.**

Sjednice Upravnog odbora Fonda su javne, a donesene odluke se objavljuju u Biltenu Univerziteta.

#### **Član 49.**

Upravni odbor Fonda može raditi ako sjednici prisustvuje većina od ukupnog broja članova.  
Upravni odbor donosi odluke većinom glasova prisutnih članova.

#### **Član 50.**

Upravni odbor Fonda:

- utvrđuje Plan rada Fonda za školsku godinu,
- donosi Finansijski plan i Izvještaj o izvršenju Finansijskog plana Fonda za svaku školsku godinu;
- podnosi Upravnom odboru Univerziteta Izvještaj o radu Fonda i Izvještaj o izvršenju Finansijskog plana;
- donosi Odluke o dodjeli: posebnih priznanja, stipendija, novčanih nagrada za postignuti uspjeh u studiju,

- donosi odluke o dodjeljivanju školarina za pokriće troškova postdiploškog studija i troškova izrade i odbrane doktorskih disertacija,
- obavlja i druge posove utvrđene ovim Pravilnikom.

## **VI ZAVRŠNE ODREDBE**

### **Član 51.**

Tumačenje odredaba ovog Pravilnika daje Upravni odbor Univerziteta.

### **Član 52.**

Izmjene i dopune ovog Pravilnika vrše se na način i po postupku propisanom za njegovo donošenje

### **Član 53.**

Ovaj Pravilnik stupa na snagu narednog dana od dana objavljivanja na oglasnoj ploči Univerziteta.

### **Član 54.**

Stupanjem na snagu ovog Pravilnika prestaju da važe Pravila o radu Fonda za stipendiranje i nagrađivanje studenata Univerziteta u Tuzli broj: 03-474/97 od 22. maja 1997. godine.

**JU UNIVERZITET U TUZLI**  
**Broj: 04-38-4638-1/01**

**Tuzla, 10.10.2001. godine**

**PREDSJEDNIK**  
**UPRAVNOG ODBORA:**

**Prof.dr. Salih Kulenović**

Ovaj Pravilnik objavljen je na oglasnoj ploči Univerziteta dana 12.10.2001. godine.